

SARS e ananela qeto ya Lekgotla le Phahameng tabeng e mabapi le BPSA

Mantaha wa la 4 Tihakubele 2024 - Khomishenara ya Ditshebeletso tsa Lekgetho tsa Afrika Borwa (SARS), Mong. Edward Kieswetter, o ananetse qeto ya Lekgotla le Phahameng, e qheletseng ka thoko kopo ya ho ipiletsa ya British Petroleum of South Africa (BPSA) ya ho lekola botjha qeto ya Khomishenara ya ho hana ditseko tsa yona tsa pusetso le ho lahlehelwa ke levi tlasa Molao wa ho Phahamiswa ha Toka Taolong (PAJA).

Tabeng yona eo, Lekgotla le Phahameng le bile la bua ka tekolobotjha ya BPSA e mabapi le qeto e nngwe ya Khomishenara, e entsweng ho latela dintlha tsa karolo ya 88(2)(a)(i) ya Molao wa Bolaodi ba Meedi le Dihlahiswa tsa Naha, 1964 (Molao wa 91 wa 1964), ya tefo ya levi le tahlehelo ya yona ka lebaka la mafura ao ho thweng a ile a romelwa ka ntle ho naha.

BPSA e ile ya lla ka hore Lekgotla le Phahameng le ne le lokela hore le be le fetiseditse qeto ena ya Khomishenara e mabapi le tsa Bolaodi ba Meedi hore le yona e ke e shebisiswe hape. Lekgotla le Phahameng le hanne kopo ena ka lebaka la hore ha ho kganyetsano ya dintlha mabapi le dintlha tsa qeto ya Bolaodi ba Meedi empa e teng e mabapi le tahlehelo.

Qeto ya Lekgotla le Phahameng ya beke e fetileng ka Labone, ke selelekela sa kahlolo ya pejana ya la 12 Pherekong 2024 moo le ileng la qhelela ka thoko boipiletsa ba BPSA tlasa karolo ya 47(9)(e) ya Molao wa Bolaodi ba Meedi le Dihlahiswa tsa Naha kgahlano le diqeto tse entsweng tlasa Molao ke Khomishenara.

Diqeto tseo di ne di bolela hore BPSA ha e monyetleng wa ho fumana dipusetso tsa kgafa hodima mafura ao BPSA e reng e a rometse Zimbabwe. Sena se jwalo hobane BPSA ha e kgone ho pakahatsa hore mafura a feela a rometswe Zimbabwe na, ebile ha e kgone ho supa moamohedi wa thepa ya amohetseng thomelontle eo Zimbabwe.

Khomishenara Kieswetter o kgotsofaditswe ke hore lekgotla le fane ka nnetefaletso le tlhakisetsa ya molao mabapi le ka moo SARS e lokelang ho shebana le dithomelontle tseo e seng tsa nnete kateng. O itse: "SARS haesale e ntse e tobana le tlwaelo ena ya dithomelontle tseo e seng tsa nnete tse nang le ditjeo hodima mokotla wa naha, mme sena se bake hore ho be le dipusetso tse sa tshwanelang." SARS e sebetsa ka thata haholo ho thusa balefalekgetho ba ikobelang boitlamo ba bona ba molao le ho bebofatsa tsa kgwebisano. Le ha ho le jwalo, re tla etsa hore ditjeo e be tse hodimo bakeng sa balefalekgetho ba etsang diketso tse qobang ho lefa lekgetho ka boomo. "Sena se tla etswa ntle le tshabo, leeme kapa tsela e inkelang diqeto," o phethetse ka ho rialo.

Ho fumana lesedi le fetang lena, ka kopo ikopanye le SARSMedia@sars.gov.za